



* DUELL: Vamp trakterer instrumenta sine svært bra. Alle foto: Stine Akeren Bjørdal.

Forrykande energi og varme frå Vamp

Vamp leverte laurdag kveld eit forrykande show for nær 900 tilhøyrarar i uteamfiet på Ivar Aasen-tunet.

Eit av dei store høgdepunkta under årets festspel var konserten med Haugesund-bandet Vamp. Det folkekjære bandet serverte tilhøyrarane i skråninga ved uteamfiet ein hitparade av sine mest kjende songar.

Band i storform

Vamp er for tida ute på sin årlege sommarturne, og bandet var fullt av energi og speglede laurdag kveld. Det var opphaldsver og kjølig i lufta, men dei sju muskarane på scena fekk varmen i publikum frå fyrste tone.

- Tusen takk og hjarteleg velkomne til konsert. Vi skal prøve å spreie varme frå scena, sa sjefen sjølv, Øyvind Staveland, til dei fram møtte. Og sjefen heldt ord.

Eit av Noreg sine beste liveband

Vamp er kjent for å skape utruleg flott musikk som er kjent for dei fleste. Bandet serverte kjente songar som blant anna "Hallo - Adjø", "Månemannen" og sjølv-sagt den aller mest kjente, nemleg "Tir na Noir". Staveland og resten av orkesteret hans klarte å bringe fram både latter og tårer med sine sceniske sprell og rikholdige songrepertoar. Samspelet mellom dei dyktige muskarane var svært tett,

og stemninga dei skapte, samt spegleda, var flott å sjå på. Å sjå far og son Staveland kose seg glugg i hel på scena, var flott å vere vitne til.

Takksamt publikum

Mot slutten av konserten gjekk stemninga i taket, og tilhøyrarane takka for konserten med ståande applaus. Det rutinerte bandet svara på tiltale. Dei spelte ekstranummer som bestod av nydelege "Liten

Fuggel" frå den siste plateinnspelinga deira med same namn. Vamp feirar i år 20 år som plateartistar, og kjem seinare i år ut med ei jubileumsplate. Alma Flo-Munch (8) hadde møtt opp for å få seg autograf frå bandet, og ho syntest Vamp var kjempeflinke.

- Favorittsongen min er "Liten Fuggel", kunne ho fortelje Møre.

Myggen likte òg det den hørte i amfiet laurdagskvelden.

✉ GARD EIRIK H. AUSTRHEIM



* FLOTT SAMSPEL: Tilhøyrarane fekk servert nydeleg musikk og mange klassikarar.



* EKSTRANUMMER: Tilhøyrarane fekk ekstranummeret "Liten Fuggel".



* **GOD STEMNING:** Vamp skapte god stemning til dei nær 900 frammmøtte.

- Nynorsk flott å lage musikk til

Etter konserten tok Vamp-grunnleggar Øyvind Staveland ein prat med Møre. Han var strålende nøgd med kvelden.

- Eg synest det gjekk storvegs. Det var flott å ha publikum så nært på, og kjekt at så mange tok turen, sa Staveland, og seier at han har eit sterkt forhold til nynorsk.

- Det er heldigvis blitt fleire og fleire som brukar nynorsk i musikken sin, og målforma er flott å lage musikk til, sa Staveland. Han fortalde avslutningsvis at å bruke sin eigen dialekt er den naturlegaste måten å uttrykkje seg på.



* **FAR OG SON:** Øyvind Staveland og sonen Odin i flott musikalsk samspel.



* **FEKK AUTOGRAF:** Alma Flo-Munch (8) fekk seg autografar.



* **HAUSTA APPLAUS:** Vamp fekk ståande applaus etter konserten. Ikkje utan grunn.



* **HYGGELEGE KARAR:** Bandet stilte velvillige opp til intervju og fotografering etter konserten.